



## Adroddiad ar ddarpariaeth addysgu Crefydd, Gwerthoedd a Moeseg mewn Ysgolion yng Nghymru (Ebrill 2024)

### **Ymchwiliwyd Gan:**

Dr Joshua Andrews

Dr Gareth Evans-Jones

Ms Rachel Healand-Sloan

a'r Athro Lucy Huskinson

**Fersiwn hygyrch ar-lein: Mai 2024**

## CYD-DESTUN AC AMCANION

Prif genhadaeth Canolfan Genedlaethol Addysg Grefyddol Cymru yw darparu arbenigedd academiaidd a chefnogaeth addysgol am ddim yn y meysydd athroniaeth, crefydd a moeseg i athrawon o lefelau TGAU hyd at gyrsiau Tystysgrif Addysg i Raddedigion (TAR), drwy gyfrwng amrywiaeth o weithgareddau, gan gynnwys gweithdai, sesiynau adolygu, a digwyddiadau DPP. Ers mis Hydref 2022, mae'r Ganolfan wedi derbyn llif cyson o adroddiadau ac adborth negyddol gan athrawon ysgolion cynradd ac uwchradd ledled Cymru ynghylch y modd y mae'r cwricwlwm newydd ar gyfer Crefydd, Gwerthoedd a Moeseg (CGM), wedi cael ei roi ar waith.

Gwelwyd yng Nghymru'r Ddeddf Cwricwlwm ac Asesu a ddaeth i fodolaeth ym mis Medi 2022, yn yn ailenwi pwnc 'Addysg Grefyddol' (AG) i 'Crefydd, Gwerthoedd, a Moeseg' (CGM), gyda'r amod ei fod yn bwnc gorfodol i bob myfyriwr o 3 i 16 oed. Cafodd y pwnc newydd hwn ei integreiddio wedyn i Faes Addysgu a Dysgu y Dyniaethau.

Er mwyn adnabod yr agweddau a oedd yn peri pryder i'r athrawon a gysylltodd, a cheisio canfod atebion posibl, ymgymrodd Cyfarwyddwyr y Ganolfan, Dr Joshua Andrews, Dr Gareth Evans-Jones, a'r Athro Lucy Huskinson, a chynorthwy-ydd ymchwil, Ms Rachel Healand-Sloan, â phrosiect ymchwil ansoddol a meintiol drwy ddsbarthu holiaduron ymysg athrawon CGM ledled Cymru. Roedd yr ymatebion yn gwbl anhysbys ac yn ddiennw, a derbyniwyd 58 ymateb o ysgolion ar draws 17 gwahanol sir a bwrdeistref Gymreig, ac o ysgolion cynradd ac ysgolion uwchradd, ysgolion anghenion addysgol arbennig, a'r rhai sy'n arbenigo mewn dysgu gydol oes. Ymatebodd 34 drwy gyfrwng y Saesneg a 24 drwy gyfrwng y Gymraeg.

## CANFYDDIADAU ALLWEDDOL

Datgelodd y canfyddiadau heriau systemaidd wrth addysgu CGM yng Nghymru, gan gynnwys materion yn ymwneud â chydymffurfiaeth gyfreithiol, gan nad yw dros hanner yr ysgolion yng Nghymru yn ateb y ddarpariaeth gyfreithiol leiaf o addysg CGM ar draws Cyfnodau Allweddol 3 a 4, ac nad oes adnoddau digonol i gefnogi'r addysg, a bod diffygion eraill yn yr addysgu.

## AMCANION YR HOLIADUR

Roedd yr holiadur yn ceisio deall sut y mae sefydliadau addysgol ledled Cymru wedi integreiddio CGM yn eu cwricwlwm ar gyfer Cyfnodau Allweddol 1-3. Yn benodol, ceisiai ddeall, (1) sut mae athrawon yn canfod gwahaniaethau rhwng CGM ac Addysg Grefyddol, o ran eu canlyniadau dysgu, setiau sgiliau, cynnwys amrywiol, methodolegau addysgu, nodau ac amcanion; (2) y graddau y mae'r cwricwlwm yma sydd wedi'i ddiweddarau yn ymgorffori amrywiaeth o grefyddau byd-eang, safbwyntiau ac athroniaethau byd-eang; (3) a addysgir CGM yn annibynnol fel pwnc ar ei ben ei hun neu fel un o nifer o bynciau wedi'u hintegreiddio i gwricwlwm Dyniaethau ehangach. Lle addysgir CGM fel rhan o gwricwlwm Dyniaethau integredig, gofynnwyd cwestiynau ychwanegol i ganfod yr amser a neilltuid i addysgu CGM o gymharu â'r pynciau eraill a addysgir ochr yn ochr ag ef, ac a oes

amrywiadau mewn lefelau staffio a chyfleoedd hyfforddi ar gyfer athrawon CGM o gymharu â'r pynciau eraill. Roedd yr holiadur hefyd yn gofyn am wybodaeth ynglŷn ag effaith bosibl cyflwyno CGM yng Nghyfnod Allweddol 3 ar ddarpariaeth AG ac Astudiaethau Crefyddol (AC) yng Nghyfnod Allweddol 4.

## CYFRANOGWYR

Roedd yr holiaduron yn targedu ysgolion cynradd, ysgolion uwchradd, a sefydliadau addysgol Anghenion Addysgol Arbennig (AAA) ledled Cymru, gan gwmpasu ysgolion y wladwriaeth a'r rhai â chymeriad crefyddol, er mwyn casglu ystod amrywiol o safbwyntiau a phrofiadau. Gan mai cymharol fach oedd yr ymatebion gan addysgwyr ysgolion cynradd, ni chafodd y set ddata hon ei chynnwys yn ein dadansoddiad, ond fe'i hystyriwyd yn ein hasesiadau o gyd-destun ehangach y ddarpariaeth CGM newydd.

Daeth 43 ymateb. Roedd y rhain gan athrawon a oedd yn addysgu naill ai mewn ysgolion uwchradd neu ysgolion a oedd yn addysgu Cyfnod Allweddol 3, mewn math o ysgolion canol. Roedd 32.56% o'r ymatebwyr yn addysgu mewn ysgolion dwyieithog, 30.23% mewn ysgolion cyfrwng Cymraeg, a 37.21% mewn ysgolion cyfrwng Saesneg. Cafwyd ymatebion gan athrawon yn y siroedd/bwrdeistrefi a ganlyn:

- Abertawe
- Caerdydd
- Caerfyrddin
- Casnewydd
- Castell-nedd Port Talbot
- Ceredigion
- Conwy
- Dinbych
- Gwynedd
- Morgannwg
- Pen-y-bont ar Ogwr
- Powys
- Rhondda Cynon Taf
- Sir Benfro
- Sir y Fflint
- Wrecsam
- Ynys Môn

Gofynnwyd i gyfranogwyr nodi eu rôl addysgu. Cafwyd amrywiaeth o atebion:

- Athro newydd gymhwyso (ANG)
- Athro dosbarth
- Pennaeth CGM
- Pennaeth y Dyniaethau
- Uwch Dîm Arwain

Yn ôl y disgwyl, roedd yr ymatebwyr yn cynrychioli athrawon â sbectwm eang o brofiadau addysgu, yn rhychwantu'r rhai a nododd eu bod yn athrawon newydd eu cymhwysu i'r rhai a oedd wedi bod yn addysgu ers hyd at 36 mlynedd.

## YR HOLIADUR

Mae'r holiadur yn cynnwys cwestiynau caeedig a phenagored i alluogi mewnwelediadau ystadegol trwy goladu setiau data meintiol, ac archwilio data ansoddol, a roddodd ddealltwriaeth ddyfnach a chlr i ni o ymatebion y cyfranogwr. Roedd gan gyfranogwyr y dewis i'w gwblhau yn Gymraeg neu yn Saesneg.

### Casglu Data

Sefydlwyd cyswllt cychwynnol gyda gweinyddwyr yr ysgol, a gofynnwyd am eu cydweithrediad wrth ddosbarthu'r holiadur i'r staff addysgu perthnasol. Cafwyd caniatâd moesegol gwybodus gan yr ysgolion a'r athrawon a gymerodd ran i sicrhau eu bod yn deall pwrpas yr holiadur, eu hawliau i dynnu'n ôl ar unrhyw adeg, a'r mesurau diogelu cyfrinachedd sydd ar waith. Gwnaed galwad agored am gyfranogwyr ar y cyfryngau cymdeithasol hefyd, gan ofalu bod pawb yn ymwybodol o'u hawl i dynnu'n ôl ar unrhyw bwynt. Roedd y cyfranogwyr yn ddienw er mwyn annog ymatebion llawnach a dirwystr. Gweinyddwyd yr holiadur yn electronig i ganiatáu casglu data yn effeithlon, llai o effaith amgylcheddol, ac i alluogi athrawon a sefydliadau i ymateb yn ôl eu cyfleustra o fewn y terfyn amser penodedig.

### Dadansoddi Data

Proseswyd y data meintiol o gwestiynau caeedig gan ddefnyddio meddalwedd ystadegol i gynhyrchu ystadegau disgrifiadol a chasgliadol, a fyddai'n darparu trosolwg meintiol o dueddiadau a phatrymau. Roedd ymatebion penagored yn destun dadansoddiad thematig, a ganiataodd hwylustod wrth nodi ac archwilio themâu, safbwyntiau a mewnwelediadau a godai dro ar ôl tro.

## CANFYDDIADAU

Mae'r adran hon yn archwilio ymatebion i'r cwestiynau allweddol yn eu tro.

### 1. A yw CGM yn eich sefydliad yn bwnc gorfodol i bob myfyriwr rhwng 3 ac 16 oed?

Fel y nodwyd, mae'n ofyniad cyfreithiol bod CGM yn cael ei addysgu yn ysgolion Cymru (Deddf Cwricwlwm ac Asesu Cymru 2022). Fodd bynnag, mae ein canfyddiadau'n datgelu nad yw cyfran sylweddol o ysgolion yn bodloni'r gofyniad cyfreithiol hwn. Dim ond 17 (39.53%) a gadarnhaodd fod CGM yn bwnc gorfodol yn eu hysgol, a nododd 25 (58.14%) nad oedd y pwnc yn cael ei drin felly. Ni roddodd un athro ymateb (2.33%).

#### Trafodaeth

Mae'r gwahaniaeth hwn yn dangos methiant i gydymffurfio â mandadau cyfreithiol, ond mae hefyd yn awgrymu bod goblygiadau sylweddol a niweidiol i ddatblygiad addysgol myfyrwyr. Mae'r cwricwlwm newydd ar gyfer CGM yn rhoi pwyslais cryf ar yr angen i ddeall credoau crefyddol amrywiol, egwyddorion moesegol amrywiol, a gwerthoedd cymdeithasol amrywiol. Trwy beidio â chynnwys CGM fel pwnc gorfodol, mae ysgolion i bob pwrpas yn dad-sgilio eu myfyrwyr o'r sgiliau cymdeithasol hanfodol ac yn amddifadu cyfleoedd iddynt ddeall eu rôl fel dinasyddion cyfrifol mewn cymdeithas gynyddol amlddiwylliannol yng Nghymru a thu hwnt. Mae CGM yn chwarae rhan hanfodol wrth hyrwyddo cydlyniant cymdeithasol a dealltwriaeth ddiwylliannol o fewn cymdeithas Cymru. Trwy archwilio gwahanol draddodiadau crefyddol, cwestiynau moesol, a fframweithiau moesegol, mae myfyrwyr yn datblygu'r sgiliau meddwl beirniadol a datrys problemau sydd eu hangen i lywio byd cynyddol amrywiol a rhyng-gysylltiedig. Mae methu â darparu'r sylfaen addysgol hon, nid yn unig yn tanseilio egwyddorion cynwysoldeb a goddefgarwch, ond hefyd yn meithrin anwybodaeth a rhagfarn. Mae amharodrwydd ysgolion i wneud CGM yn bwnc gorfodol yn adlewyrchu problem systemaidd sy'n ymestyn y tu hwnt i sefydliadau unigol. Mae'n tanlinellu'r angen am fwy o atebolrwydd a gorfodi safonau addysgol i sicrhau bod pob myfyriwr yn gallu manteisio ar gwricwlwm cynhwysfawr a chynhwysol.

Nododd rhai ymatebwyr hefyd fod eu hysgol wedi eithrio CGM o'u cwricwlwm Cyfnod Allweddol 4, sy'n dangos y gallai rhai ysgolion fethu â chyflawni'r rhwymedigaeth gyfreithiol i addysgu CGM hyd at ddiwedd Cyfnod Allweddol 4. Mae hyn yn ysgogi'r angen i ymchwilio i ddyfodol cymwysterau TGAU yn y maes pwnc hwn.

### 2. Pa grefyddau sy'n cael eu hastudio fel rhan o'r cwricwlwm newydd?

Er mai nod fframwaith y cwricwlwm newydd yw grymuso athrawon i ymgorffori ystod ehangach o safbwyntiau moesegol ac athronyddol o'r byd, mae'n amlwg bod llawer o ysgolion yn dal i ganolbwyntio'n bennaf ar astudio'r 'chwe chrefydd fawr' draddodiadol (Cristnogaeth, Iddewiaeth, Islam, Hindwâeth, Siciaeth a Bwdhaeth). O ganlyniad, mae'r ysgolion hyn yn cyflwyno cwricwlwm AG yn hytrach na chroesawu rhesymeg y cwricwlwm CGM.

Mae canlyniadau'r arolwg yn datgelu bod gan Gristnogaeth fonopoli ar y crefyddau a astudiwyd, gyda 98%, cyfran sylweddol o'r ymatebwyr, yn nodi ei bod wedi'i chynnwys yn eu cwricwlwm. Dangosodd yr astudiaeth fod Iddewiaeth yn cael ei chynnwys yng nghwricwlwm 88% o'r ymatebwyr, ac Islam yng nghwricwlwm 84% yr ymatebwyr. Mae'r canlyniadau hyn yn adlewyrchu tueddiadau traddodiadol addysg grefyddol Cymru. Tra bod crefyddau dharmaidd yn cael eu cynrychioli, megis Hindŵaeth (72%), Bwdhaeth (70%), a Siciaeth (63%), mae cynnwys crefyddau lleiafrifol eraill, megis Paganiaeth, Dyneiddiaeth, a'r Ffydd Bahá'i yn fach iawn, gyda dim ond 5% o athrawon yn dweud eu bod yn cynnwys y crefyddau hyn yn eu cwricwlwm.

Mae'r data'n dynodi y ddiffyg ystyriaeth sylweddol sydd wedi'i rhoi i safbwyntiau seciwlar ac athronyddol, gyda dim ond 2% o'r athrawon yn adrodd eu bod wedi astudio anffyddiaeth a chredoau anghrefyddol. Mae hyn yn awgrymu bod cyfle wedi'i gollu gan ysgolion i arallgyfeirio eu cwricwlwm a rhoi amlygiad amhrisiadwy i fyfyrwyr i sbectrwm ehangach o safbwyntiau moesol ac athronyddol.

### **Trafodaeth**

Mae absenoldeb bydolygon penodol sy'n berthnasol i ardaloedd lleol a rhanbarthol Cymru, neu'r rhai sy'n ymwneud ag arbenigeddau staff, yn peri pryder. Er gwaethaf yr hyblygrwydd a roddir gan y fframwaith cwricwlwm newydd, prin yw'r dystiolaeth i awgrymu bod ysgolion yn defnyddio'r cyfle hwn i ymgorffori'r safbwyntiau amrywiol a allai cyseinio'n agosach â phrofiadau bywyd eu myfyrwyr eu hunain a/neu arbenigedd eu staff addysgu.

Mae ein canfyddiadau yn amlygu bwlch sylweddol rhwng amcanion y cwricwlwm CGM a'i weithrediad mewn ysgolion ledled Cymru. Ymddengys bod y rhan fwyaf o ysgolion yn cynnal golwg gul a chyfyngedig ar grefydd, gan ganolbwyntio ar grefyddau traddodiadol yn unig, tra'n esgeuluso'r mandad ehangach i gyflwyno myfyrwyr i ystod eang o safbwyntiau seciwlar ac athronyddol. Wrth symud ymlaen, mae'n hanfodol i ysgolion gofleidio egwyddorion CGM drwy amrywio eu cwricwlwm er mwyn sicrhau bod myfyrwyr yn cael eu huwchsgilio a'u trwytho â dealltwriaeth fwy cynhwysfawr o foeseg, gwerthoedd a safbwyntiau'r byd.

### **3. A oes adnoddau ar gael i gynorthwyo ysgolion i ddatblygu a chyflwyno'r cwricwlwm CGM newydd?**

Dim ond 18 (41.86%) o ymatebwyr a ddywedodd fod adnoddau ar gael i gynorthwyo ysgolion i ddatblygu'r cwricwlwm newydd. Dywedodd 25 (58.14%) o ymatebwyr fod adnoddau'n annigonol iawn ac nad oedd adnoddau ar gael yn rhwydd. Nodwyd mai dim ond un gwerslyfr swyddogol sydd yn bodoli, ac yn uniaith Saesneg.<sup>1</sup>

### **Trafodaeth**

Mae ein canfyddiadau'n datgelu diffyg cymorth ac arweiniad i athrawon sy'n peri pryder. Mae prinder adnoddau yn codi cwestiynau difrifol am gynllunio a gweithredu'r cwricwlwm

---

<sup>1</sup> Parry, L. and Hayes, J. (2022) Curriculum for Wales: Religion, Values and Ethics for 11-14 years, Hodder Education: London (ISBN-10: 1398348740; 232 tudalen).

newydd. Mae deunyddiau addysgu digonol yn hanfodol er mwyn sicrhau datblygiad digonol o'r pwnc a'r gallu i'w addysgu'n effeithiol mewn ysgolion.

Mae'r ffaith mai dim ond un gwrslyfr CGM swyddogol sydd wedi'i gyhoeddi, a dim ond yn Saesneg, ar gyfer disgyblion 11-14 oed, yn gwbl annigonol. Ar ben hynny, mae ffocws y llawlyfr hwn yn bennaf ar wahanol grefyddau, ac o'r herwydd, nid yw'n mynd i'r afael â chylch gorchwyl ac egwyddorion ehangach CGM. Mae hyn yn broblematic, yn enwedig gan fod athro yn ceisio cynllunio ar gyfer ei addysgu ochr yn ochr â phynciau eraill, megis Hanes a Daearyddiaeth, fel rhan o gwricwlwm cymysg y Dyniaethau.

Mae absenoldeb fersiwn Gymraeg o'r gwrslyfr yn gwaethygu'r mater ymhellach ac yn codi pryderon sylweddol am y ddarpariaeth o adnoddau cyfrwng Gymraeg ac agweddau tuag at addysg cyfrwng Gymraeg. Er gwaethaf cydraddoldeb cyfreithiol y Gymraeg a'r Saesneg yng Nghymru ers 2011, mae'r methiant i gyhoeddi fersiwn Gymraeg o'r gwrslyfr hwn ar yr un pryd â'r fersiwn Saesneg yn awgrymu bod addysgu a dysgu CGM yn Gymraeg o werth llai nag ydyw yn Saesneg. Mae ymatebwyr wedi ymateb i'r gwrslyfr uniaith Saesneg gyda rhwystredigaeth, ag un yn nodi eu bod wedi cysylltu'n bersonol â'r cyhoeddwr, Hodder Education, i ofyn am ganiatâd i gyfieithu rhai rhannau o'r llyfr. Gwrthodwyd caniatâd. Daeth i'r amlwg ers hynny nad oes gan Hodder Education unrhyw fwriad i gyfieithu'r gwrslyfr hwn i'r Gymraeg.

Er gwaethaf yr heriau hyn, soniodd ymatebwyr am rai enghreifftiau cadarnhaol o ffynonellau defnyddiol, yn enwedig gan ymatebwyr a oedd wedi'u lleoli yn rhanbarthau de-ddwyrain a de-orllewin Cymru, lle crybwyllwyd sawl gwaith bod Cyngor Ymgynghorol Statudol ar Addysg Grefyddol (CYSAG) Abertawe wedi bod yn gyson ac yn glir o ran ei ganllawiau ar gyfer gweithredu'r cwricwlwm CGM. Yn ogystal, nodwyd bod adnoddau pedagogaid sydd ar gael ar lwyfannau ar-lein megis gwefan NATRE, gwefannau Dyneiddwyr, a grwpiau CGM Facebook yn cynnig rhywfaint o gymorth i athrawon sy'n llywio'r cwricwlwm newydd.

#### **4. A yw canllawiau'r llywodraeth<sup>2</sup> wedi eich helpu i ddatblygu CGM yn eich ysgol?**

Mynegodd mwy na hanner yr ymatebwyr (23: 53.49%) anfodlonrwydd â chanllawiau Senedd Cymru (SC). Roedd yr ymatebwyr hyn o'r farn bod y canllawiau'n amwys ac o bosibl yn gamarweiniol. Nododd sawl un fod y canllawiau'n annelwig, yn aneglur, ac yn agored i ddehongliadau hollol wahanol, gan awgrymu felly'r potensial ar gyfer addysgu cwricwlwm CGM tra gwahanol mewn ysgolion yng Nghymru. Nododd rhai eu bod yn ymdrin â dysgu CGM fel pe bai'n dal i fod yn AG. Nododd eraill eu bod yn datblygu eu cwricwlwm i ganolbwyntio mwy ar athroniaeth a llai ar grefydd.

Roedd nifer o ymatebwyr yn teimlo bod y termau 'gwerthoedd' a 'moeseg' sy'n rhan o CGM yn gofyn am ddiffiniadau clir, a chanllawiau ar y pynciau y dylid eu cynnwys yn yr astudiaeth

---

<sup>2</sup> Mae canllawiau SC i'w gweld yma <https://www.gov.wales/sites/default/files/consultations/2021-05/consultation-document-curriculum-for-wales-religion-values-and-ethics-guidance.pdf>

o werthoedd a moeseg. Teimlai rhai o'r ymatebwyr fod hyn yn peri pryder arbennig i'r rhai sy'n addysgu CGM mewn ysgolion anghenion addysgol arbennig (AAA).

Cydnabu un athro fod y canllawiau a amlinellwyd ar ddiwedd y ddogfen cwricwlwm Cymraeg yn ddefnyddiol "i raddau".

### **Trafodaeth**

Mae methiant SC i ddarparu gweledigaeth drefnus a chydlynol ar gyfer CGM wedi arwain at athrawon yn cael trafferth dehongli a gweithredu'r cwricwlwm yn effeithiol. Mae'r diffyg eglurder hwn yn arwain at ddehongliadau amrywiol a chyferbyniol, sydd â'r potensial i arwain at wahaniaethau yn ansawdd a chynnwys y pwnc ar draws ysgolion yng Nghymru. Mae hyn yn codi cwestiynau ynghylch a yw myfyrwyr ledled Cymru yn cael eu paratoi'n ddigonol ar gyfer TGAU Addysg Grefyddol o fewn eu cwricwlwm Cyfnod Allweddol 3, ac a yw ysgolion yn mynd i'r afael yn realistig â phynciau moeseg a gwerthoedd yn eu cwricwlwm neu'n dychwelyd i'r cwricwlwm Addysg Grefyddol hyn yn unig. At hynny, mae'r diffyg arweiniad ar gyfer ysgolion AAA yn tanlinellu'r angen am ymchwil bellach a chymorth wedi'i deilwra yn y maes hwn.

### **5. Ydych chi wedi cael y cyfle am hyfforddiant proffesiynol i'ch cynorthwyo gyda'r cwricwlwm newydd?**

Ymysg yr ymatebwyr, dywedodd 24 (55.81%) eu bod wedi derbyn rhyw fath o hyfforddiant, tra dywedodd 19 (44.19%) nad oeddent wedi derbyn hyfforddiant. Daeth anghysondeb clir i'r amlwg rhwng athrawon cyfrwng Saesneg a chyfrwng Cymraeg, gyda chyfran sylweddol uwch o athrawon cyfrwng Cymraeg yn nodi nad oeddent wedi derbyn unrhyw fath o hyfforddiant.

### **Trafodaeth**

Mae'r diffyg eglurder ar ganllawiau SC yn cael ei waethygu gan y ffaith mai cymharol ychydig o athrawon CGM sydd wedi derbyn hyfforddiant ar gyfer y cwricwlwm newydd. Mae disgwyl i bob athro dderbyn hyfforddiant digonol i reoli'r newidiadau sylweddol yn y cwricwlwm. Mae'r diffyg hyfforddiant i athrawon cyfrwng Cymraeg yn peri pryder arbennig, ac mae'r pryder hwn yn ddirfawr waethygol gydag absenoldeb gwrslyfr cyfrwng Cymraeg (gweler uchod). Mae diffyg hyfforddiant cyfrwng Cymraeg i CGM yn tanseilio egwyddorion addysg ddwyieithog ac yn peryglu dieithrio myfyrwyr Cymraeg eu hiaith yn unigol a thrwy barhau ag anghyfartaledd ieithyddol o fewn y gyfundrefn addysg.

Cafwyd ymatebion cadarnhaol gan ymatebwyr yr oedd eu hysgolion yn darparu hyfforddiant ar gyfer y cwricwlwm newydd. Canmolwyd mentrau penodol. Mae'r rhain yn cynnwys ymdrechion rhai unigolion, megis Jennifer Harding-Richards, Cynghorydd Addysg Grefyddol ac aelod o'r CYSAG ar gyfer Abertawe, Sir Gaerfyrddin a Sir Benfro, a gynhaliodd sesiynau hyfforddi gyda'r nos ar gyfer athrawon mewn ysgolion ar draws y rhanbarth hwn i archwilio gwahanol grefyddau a safbwyntiau'r byd. Menter arall a grybwyllwyd oedd cynllun Lat



Blaylock o *RE Today*, sy'n cynnal sesiynau hyfforddi i athrawon, a chynhadledd, StrictlyRE, sydd ill dau wedi'u targedu at athrawon ledled y DU ac angen tâl i fynychu (£100+).

Soniodd un ymatebydd fod Adran Addysg yr Esgobaeth yn cynnig rhai sesiynau hyfforddi ar-lein (dros TEAMS). Nid yw'n glir o'u hymateb beth oedd cynnwys y rhain. Yn yr un modd, soniodd ymatebydd o Bowys fod teithiau addysgol a gweithgor ar gael iddynt i'w helpu i fynd i'r afael â'r cwricwlwm newydd, ond nid yw manylion y rhain yn glir. Mae'r mentrau a grybwyllwyd yn awgrymu bod cyfleoedd hyfforddi yn ysbeidiol ac nad ydynt ar gael i lawer o ranbarthau yng Nghymru, oni bai bod unigolion yn fodlon ac yn gallu talu am y cyfleoedd sydd ar gael iddynt ar-lein, ac o gyfeiriad Lloegr.

Mae'n bwysig nodi bod y sesiynau hyfforddi sydd ar gael i fyfyrwyr yn Abertawe a Sir Gaerfyrddin yn cael eu cynnal gyda'r nos ac ar benwythnosau. Roedd hyn yn gofyn i athrawon aberthu amser personol, ac roedd yn anochel yn golygu na fyddai rhai athrawon yn gallu bod yn bresennol. Ymhellach, mae'r sesiynau hyn yn dibynnu ar ewyllys da academyddion sydd ag arbenigedd mewn athroniaeth, crefydd a moeseg i gyfrannu at y sesiynau hyfforddi. Yn wir, mae aelodau o'n Canolfan wedi cyfrannu atynt.

Disgrifiodd rhai ymatebwyr, a nododd fod rhywfaint o hyfforddiant yn cael ei roi iddynt o fewn eu sefydliad eu hunain, nad oedd y sesiynau yn ddefnyddiol. Roedd eraill yn eu gweld yn gymharol ddefnyddiol. Roedd cysondeb ac effeithiolrwydd yr hyfforddiant a ddarperir gan ysgolion yn amrywio'n sylweddol.

O ystyried yr ailwampio cynhwysfawr ar y cwricwlwm i gynnwys safbwyntiau athronyddol a moesegol ehangach, mae'n destun pryder nad yw hyfforddiant eang ar gael i bob athro CGM i sicrhau eu bod yn teimlo eu bod wedi'u paratoi'n ddigonol i gyflwyno'r cwricwlwm newydd. Mae'n hanfodol mynd i'r afael â bylchau mewn hyfforddiant. Mae angen ymchwil pellach i nodi'r hyfforddiant sydd ar gael i bob rhanbarth ledled Cymru ac ymarferoldeb ei gostau ac amseriad ei gyflwyno.

## **6. A yw'r cwricwlwm newydd i Gymru wedi bod o fudd i CGM?**

Mae 25 (58.14%) o ymatebwyr yn credu bod y cwricwlwm newydd yn fuddiol mewn theori ac y gallai fod yn effeithiol pe bai'n cael ei ddatblygu a'i gymhwyso'n ofalus. Dywedodd 17 (39.53%) nad oedd y cwricwlwm newydd yn fuddiol, gyda sawl un yn nodi ei ddiffyg gweledigaeth gydlynol. Roedd nifer sylweddol o'r rhai a fynegodd anfodlonrwydd yn dod o ysgolion cyfrwng Cymraeg, sef 11 o ymatebwyr. Dewisodd un ymatebydd beidio ag ateb y cwestiwn hwn.

### **Trafodaeth**

Mae ymatebwyr yn cydnabod manteision posibl cwmpas ehangach y cwricwlwm gyda'i allu ar gyfer addysg drawsnewidiol drwy annog myfyrwyr i archwilio profiadau bywyd amrywiol, traddodiadau crefyddol amrywiol, a safbwyntiau athronyddol amrywiol, ac i fyfyrion ddyfnach ar faterion moesegol. Ond mynegodd ymatebwyr bryderon hefyd am yr anghysondebau a'r amwysedd sy'n gysylltiedig â gweithredu CGM ar draws ysgolion yng Nghymru. Nodwyd gan rai nad oes gan CGM hunaniaeth gydlynol. Adlewyrchwyd hyn mewn

sawl ymateb lle mynegodd athrawon ddryswch ac anawsterau wrth drosglwyddo o gwricwlwm traddodiadol AG i fframwaith ehangach a mwy cynhwysol CGM. Nodwyd yma eto gan athrawon mai'r diffyg arweiniad unedig ac eglurder gan y llywodraeth ar y gwahaniaethau rhwng y ddau bwnc sy'n allweddol i'r broblem.

Yn y pen draw, er bod athrawon yn cydnabod gwerth a photensial cynhenid CGM, mae mynd i'r afael â'r bylchau presennol o ran gweithredu a darparu cymorth ac arweiniad digonol yn gamau hollbwysig tuag at wireddu ei fanteision llawnach yn addysg Cymru.

## **7. Sawl awr o amser cwricwlwm y mae AG/CGM yn ei dderbyn yn eich ysgol ar hyn o bryd?**

Mae'r oriau a ddyrannir i addysgu CGM yn amrywio'n sylweddol ar draws ysgolion. Ar gyfartaledd, yr amser a neilltuir i addysgu CGM yw awr yr wythnos. Fodd bynnag, adroddwyd dyraniadau amser amrywiol. Nododd rhai ymatebwyr amgylchiadau mwy ffafriol, megis dwy awr yr wythnos, gydag un ymatebydd yn nodi dyraniad o bum awr yr wythnos ar gyfer myfyrwyr Blwyddyn 7, ac yna dwy awr yr wythnos ar gyfer myfyrwyr ym Mlynnyddoedd 8 a 9. Nododd un ymatebydd fod CGM yn derbyn dim ond 15 awr y flwyddyn ac fe'i neilltuwyd fel rhan o gwricwlwm cymysg y Dyniaethau.

### **Trafodaeth**

Mae cryn wahaniaeth yn yr oriau a ddyrannir ar gyfer CGM ar draws ysgolion yng Nghymru. Mae hyn yn atgyfnerthu anghysondebau wrth gyflwyno'r cwricwlwm ac yn codi cwestiynau sylweddol ynghylch cyfle cyfartal sydd ar gael i fyfyrwyr sy'n astudio CGM yng Nghymru. Lle mae'r amser a neilltuir i CGM yn hynod gyfyngedig, mae myfyrwyr yn annhebygol o gael eu hamlygu i'r amrywiaeth o safbwyntiau crefyddol a materion moesegol sy'n ofynnol ar gyfer y cwricwlwm CGM, ac, yn yr un modd, mae'n debygol o arwain at ddealltwriaeth arwynebol ac argraffiadau sgiw o'r gwerthoedd a fabwysiadwyd o fewn cymdeithas a'r rhai a gynhelir mewn diwylliannau eraill. Gallai gostyngiad yn y dyraniad amser felly danseilio a niweidio canlyniadau arfaethedig y cwricwlwm newydd yn anfwriadol.

Amlygodd un ymatebydd mai dim ond am 15 awr y flwyddyn yr addysgir CGM fel rhan o gwricwlwm cymysg y Dyniaethau. Mae hyn yn frawychus, gan y neilltuir 4 awr yr wythnos i bynciau Dyniaethau gyda'i gilydd. Mae hyn yn golygu bod meysydd pwnc eraill yn cael eu blaenoriaethu'n drwm ar draul CGM.

Mae angen gwneud rhagor o ymchwil i ddeall a yw'r newid o gwricwlwm Addysg Grefyddol ar ei ben ei hun i'w integreiddio i fframwaith Dyniaethau ehangach wedi cael effaith negyddol ar nodau ac amcanion ac ansawdd addysgu CGM, ac, o ganlyniad, gostyngiad mewn llythrennedd crefyddol, sgiliau datrys problemau, sgiliau dadansoddi beirniadol, rhesymu moesegol, a dealltwriaeth foesol ymhlith ymadawyr ysgol yng Nghymru.

## **8. A yw CGM yn derbyn yr un faint o amser â'r hen gwricwlwm ar gyfer AG yng Nghymru?**

Dywedodd 26 (60.47%) o ymatebwyr fod CGM yn derbyn yr un oriau neu oriau tebyg ag y byddai AG cyn trosglwyddo i'r cwricwlwm newydd. Nododd 15 (34.88%) o ymatebwyr fod y

pwnc yn derbyn llai o oriau. Nid ymatebodd 2. Nododd 2 ymatebydd fod eu hysgolion wedi dewis naill ai lleihau CGM/AG yng Nghyfnod Allweddol 4 neu ei ddileu yn gyfan gwbl.

## Trafodaeth

Mae'r gostyngiad yn y ddarpariaeth CGM o'i gymharu â'i gymar hŷn, AG, yn eang. Mae tynnu neu leihau CGM o Gyfnod Allweddol 4 yn frawychus mewn dwy ffordd. Yn gyntaf, mae'n mynd yn uniongyrchol groes i'r gofyniad cyfreithiol bod CGM yn cael ei addysgu i bob myfyriwr hyd at 16 oed. Mae rhai ysgolion felly'n methu yn eu rhwymedigaeth gyfreithiol i ddarparu addysg gynhwysfawr i'w myfyrwyr trwy beidio ag addysgu cynnwys a sgiliau hanfodol iddynt sy'n perthyn i gynwysoldeb a goddefgarwch. Yn ail, mae'n amddifadu myfyrwyr o'r cyfle i ddatblygu sgiliau bywyd sy'n hanfodol ar gyfer datblygiad personol a chymdeithasol.

## 9. A oes angen mwy o amser cwricwlwm ar CGM?

Mae 32 (74.42%) o ymatebwyr yn credu bod CGM angen dyraniad mwy o oriau a addysgir yn y cwricwlwm i sicrhau ei fod yn cael ei addysgu'n briodol er mwyn rhoi digon o amser i fyfyrwyr ddysgu ei gynnwys a'i sgiliau. Mae sylwadau gan ymatebwyr yn cynnwys:

"Rydyn ni'n cael hanner yr amser mae Hanes a Daearyddiaeth yn ei gael ym Mlwyddyn 7 ac 8 a hyd yn oed yn llai ym Mlwyddyn 9. Ac eto, mae disgwyl i ni wneud yr un lefel o gynnydd gyda'r myfyrwyr."

"Yr unig bynciau eraill a neilltuir cyn lleied o amser yw'r Celfyddydau. Fel pwnc academiaidd dylai CGM dderbyn oriau tebyg i'r dyniaethau eraill."

"CGM yw un o'r pynciau mwyaf perthnasol rydyn ni'n ei ddysgu i fyfyrwyr gan y bydd yn rhaid iddyn nhw ddeall crefydd, moeseg ac athroniaeth pan maen nhw'n mynd i'r byd go iawn. Ond er gwaethaf delio â phethau mor bwysig, mae'n derbyn llai o amser na'r dyniaethau eraill."

## Trafodaeth

Mae'r alwad am fwy o amser i addysgu CGM yn amlygu diffyg canfyddedig yn strwythur presennol y cwricwlwm o gymharu â phynciau eraill yng nghwricwlwm y Dyniaethau. Er gwaethaf y mandad cyfreithiol i addysgu CGM fel pwnc gorfodol, mae ein hymchwil yn awgrymu y gallai ysgolion fod yn cael trafferth ei integreiddio'n effeithiol o fewn amserlenni a blaenoriaethau presennol. Gall hyn gael ei waethygu gan alwadau cystadleuol i addysgu pynciau eraill, gan adnoddau cyfyngedig ar gyfer CGM, a chan ddiffyg hyfforddiant, a chefnogaeth annigonol i athrawon CGM.

Mae sylwadau gan athrawon yn awgrymu y gallai'r awydd cyffredin am fwy o amser a neilltuir i CGM adlewyrchu canfyddiadau ehangach am arwyddocâd cynyddol CGM mewn cymdeithas heddiw, i arfogi myfyrwyr â'r sgiliau sydd eu hangen i lywio heriau'r byd go iawn, materion moesol a moesegol cymhleth, ac i ymgysylltu'n adeiladol â chymunedau amrywiol.

Nododd un ymatebydd, “Nid oes gan CGM y 5% penodedig, nid ar sail y canllawiau ar Hwb.”<sup>3</sup> Mae hyn yn tanlinellu’r diffyg canllawiau clir a roddir i’r dyraniad amser gofynnol ar gyfer y pwnc, ac mae hyn, yn ei dro, yn rhwystro ymdrechion i leoli CGM yn deg ac yn ddigonol o fewn y cwricwlwm.

## 10. A yw AG/CGM yn bwnc ar ei ben ei hun neu’n rhan o gwricwlwm y Dyniaethau?

Dywedodd 25 (58.14%) o ymatebwyr fod CGM wedi’i integreiddio i gwricwlwm Dyniaethau cymysg yn eu hysgol, a dywedodd 18 (41.86%) o ymatebwyr ei fod yn cael ei addysgu fel pwnc ar ei ben ei hun.

### Trafodaeth

Mae addysgu CGM fel rhan o gwricwlwm Dyniaethau cymysg yn awgrymu dull rhyngddisgyblaethol, lle mae themâu crefydd, gwerthoedd a moeseg yn cydblethu â phynciau eraill, fel hanes, daearyddiaeth ac astudiaethau cymdeithasol. Mae gan y dull hwn y potensial i roi dealltwriaeth fwy cyfannol i fyfyrwyr o sut mae credoau crefyddol ac egwyddorion moesegol yn croestorri â materion cymdeithasol ehangach. Trwy integreiddio CGM i gwricwlwm y dyniaethau, gall ysgolion feithrin gwerthfawrogiad dyfnach o gydgyssylltiad gwahanol safbwyntiau diwylliannol a fframweithiau moesol.

Fodd bynnag, mae’r data yr ydym wedi’i gasglu o’r arolwg yn awgrymu nad yw’r dull integreiddiol a chyfannol hwn yn cael ei fabwysiadu, ond, yn hytrach, bod CGM yn cael ei wthio i’r cyrion gan ganolbwyntio ar addysgu pynciau eraill a gynrychiolir yn y cwricwlwm Dyniaethau cymysg. Yn ogystal â pha mor hawdd yw gwrthio pynciau i’r cyrion o blaid eraill, mae dull y Dyniaethau cymysg yn cynyddu’r tebygolrwydd y bydd myfyrwyr yn cael eu haddysgu gan rywun nad oes ganddynt unrhyw arbenigedd mewn un neu fwy o’r pynciau a astudir. Mae hyn yn golygu y gallai dyfnder ac ansawdd y cyfarwyddyd a’r addysg gael eu peryglu.

Mae addysgu CGM fel pwnc ar ei ben ei hun yn cynnig y fantais o dderbyn amser penodedig lle gellir canolbwyntio’n benodol ar addysg grefyddol, gwerthoedd, a moeseg, a chyfleoedd ar gyfer trafodaethau dyfnach, mwy ystyrlon a myfyrdodau beirniadol ar faterion cymhleth yn ymwneud â moesoldeb, hunaniaeth a chred. Mae rhinweddau ac anfanteision i’r ddau ddull, a bydd y penderfyniad i addysgu CGM o fewn cwricwlwm Dyniaethau cymysg neu fel pwnc ar ei ben ei hun yn amrywio, yn dibynnu ar ffactorau megis adnoddau ysgol, blaenoriaethau’r cwricwlwm, a dewisiadau addysgegol. Waeth beth fo’r dull a ddefnyddir, mae’n hollbwysig bod CGM yn cael ei addysgu’n gynhwysfawr.

Ceisiodd y tri chwestiwn nesaf (10b-10ch) egluro’r agweddau cadarnhaol a negyddol ar y gwahanol ddulliau hyn o addysgu CGM, ac a yw addysgu CGM fel rhan o gwricwlwm dyniaethau integredig yn gosod cyfyngiadau difrifol ar y gallu i’w addysgu’n effeithiol, o ran yr amser a ddyrannid a’r diffyg arbenigedd i’w addysgu.

---

<sup>3</sup> Hwb: y gronfa adnoddau ar-lein gan y llywodraeth i gefnogi’r Cwricwlwm i Gymru: <https://hwb.gov.wales/resources>.

### **10b. Os addysgir CGM fel rhan o gwricwlwm y dyniaethau, a yw'n derbyn yr un faint o amser â phynciau eraill y Dyniaethau?**

Mae 65% (27 o'r ymatebwyr) yn addysgu CGM fel rhan o gwricwlwm cymysg y Dyniaethau. O'r grŵp cynrychioliadol hwn, nododd 12 o'r ymatebwyr (27.91%) nad yw CGM yn derbyn yr un faint o amser â phynciau eraill y Dyniaethau, a nododd 16 (37.21%) fod y pwnc yn derbyn amser cyfartal. Darparodd 3 ymatebydd fanylion pellach ynghylch sut y mae CGM yn rhan o'u cwricwlwm Dyniaethau fel a ganlyn. Nododd 1 ymatebydd, er bod Hanes a Daearyddiaeth yn derbyn tair awr yr wythnos, dim ond dwy awr y pythefnos y mae CGM yn ei dderbyn. Dywedodd un arall fod Hanes a Daearyddiaeth yn derbyn cyfanswm o 70 awr yr un ar gyfer myfyrwyr ym Mlynnyddoedd 7 ac 8, tra bod CGM yn derbyn 15 awr yn unig o fewn yr un amserlen. Soniodd y trydydd ymatebydd eu bod yn cael dysgu CGM am ddim ond hanner yr amser a neilltuir i Hanes a Daearyddiaeth i fyfyrwyr ym Mlynnyddoedd 7 ac 8, gyda gostyngiad pellach i 1 awr bob pythefnos ar gyfer myfyrwyr Blwyddyn 9.

#### **Trafodaeth**

Rhannwyd y cyfraddau ymateb rhwng 10b a 10c. Mae ymatebion i 10b yn cadarnhau bod gwahaniaeth sylweddol rhwng yr amser a neilltuir i CGM o'i gymharu â phynciau eraill y Dyniaethau, ac mae'r ymatebion yn rhoi rhywfaint o fewnwelediad i'r anfodlonrwydd y mae athrawon yn ei deimlo am y gwahaniaeth. Mae ymatebion i'r cwestiwn hwn yn amlygu pwysigrwydd teimladau'r athro am eu harbenigedd pwnc a'u hyder yn eu gallu i lywio'r broses o gyflwyno CGM. Nododd un ymatebydd fod dyrannu amser ar gyfer CGM o fewn y cwricwlwm Dyniaethau yn dibynnu ar hyfedredd a brwdfrydedd yr athro eu hunain ar gyfer addysgu thema uned. Mae hyn yn dynodi amrywiadau sylweddol posibl yn ansawdd a chysondeb addysgu CGM ar draws ystafelloedd dosbarth ac yn codi pryderon am y profiad addysgol a chanlyniadau i fyfyrwyr.

### **10c. Os addysgir CGM fel pwnc annibynnol, a yw'n cael yr un faint o amser cwricwlwm â phynciau eraill y Dyniaethau?**

Nododd un ymatebydd fod CGM fel pwnc ar ei ben ei hun yn derbyn 2 awr bob yn ail wythnos, o gymharu â 3 awr yr wythnos ar gyfer pynciau unigol Hanes a Daearyddiaeth. Nododd ymatebydd arall fod CGM yn derbyn 1 awr yn llai bob pythefnos o gymharu â phynciau eraill y Dyniaethau ac nad yw CGM yn cael ei gynnwys na'i grybwyll yn nyddiau sefydlu Blwyddyn 6. Soniodd sawl ymatebydd fod CGM yn derbyn llai o amser addysgu ym Mlynnyddoedd 8 a 9 fel pwnc ar ei ben ei hun o gymharu â Hanes a Daearyddiaeth. Dywedodd rhai ymatebwyr fod y pwnc, yn syml, yn derbyn "llai" o amser, gan nodi canfyddiad neu ymwybyddiaeth gyffredinol o CGM yn derbyn llai o sylw neu lai o adnoddau o gymharu â phynciau Dyniaethau annibynnol eraill. Nododd un ymatebydd fod Daearyddiaeth a Hanes ill dau yn derbyn dwywaith yr amser addysgu ag ydyw Crefydd a Moeseg ym Mlwyddyn 9 pan gânt eu haddysgu fel pynciau unigol. Mynegodd rhai ymatebwyr ansicrwydd ynghylch y gwahaniaethau mewn amser addysgu rhwng CGM a phynciau eraill y Dyniaethau pan gânt eu haddysgu'n annibynnol ar ei gilydd. Mae dau ymatebydd yn nodi bod CGM yn derbyn awr yn llai yr wythnos, gan amlygu y bu gostyngiad penodol yn yr amser a neilltuwyd i CGM o gymharu â phynciau unigol eraill. Nododd un

ymatebydd nad oes unrhyw wahaniaeth yn yr amser addysgu ar gyfer myfyrwyr Blwyddyn 8 pan addysgir CGM fel pwnc ar ei ben ei hun.

### **Trafodaeth**

Fel ymatebion ar gyfer 10b, mae'r wybodaeth a gasglwyd yma yn cadarnhau'r gwahaniaethau rhwng yr amser a neilltuir i CGM o'i gymharu â phynciau eraill y Dyniaethau, a'r anfodlonrwydd y mae athrawon yn ei deimlo am hyn. Mae'r ffaith nad yw CGM wedi'i gynnwys na'i grybwyll yn nyddiau sefydlu Blwyddyn 6 mewn un ysgol yn awgrymu nad yw CGM yn derbyn yr un lefelau neu lefelau tebyg o bwyslais neu ystyriaeth â phynciau eraill yn ystod cyfnodau trosiannol allweddol yn addysg eu myfyrwyr.

### **10ch. A yw eich ysgol yn darparu hyfforddiant i athrawon nad ydynt yn arbenigo mewn pynciau i sicrhau y gallant ddarparu'r addysg orau i'r Dyniaethau?**

Dyweddodd 9 (20.93%) o ymatebwyr fod eu hysgolion yn darparu hyfforddiant i athrawon Dyniaethau nad oeddent yn arbenigwyr yn eu pwnc Dyniaethau. Dywedodd 33 (76.74%) o'r ymatebwyr nad oedd unrhyw gyfleoedd hyfforddi ar gael i'r rhai nad ydynt yn arbenigwyr ym mhynciau'r Dyniaethau. Nododd un bod eu Pennaeth Adran yn sicrhau hyfforddiant mewn Hanes a Daeryddiaeth ond nid mewn CGM, oherwydd mai'r hyn yw'r pwnc, meddai, yw "dim ond barn, beth bynnag". Soniodd un ymatebydd am yr angen i athrawon Hanes gamu i mewn a dysgu gwersi CGM oherwydd prinder staff.

### **Trafodaeth**

Mae'n amlwg o sylwadau'r ymatebwyr fod yna bryder amlwg gan athrawon am y diffyg arbenigedd pwnc ymhlith athrawon sydd â'r dasg o gyflwyno CGM a phynciau Dyniaethau eraill. Tynnodd rhai ymatebwyr sylw at y gwahaniaethau sylweddol mewn pynciau cynnwys a sgiliau CGM, Hanes, a Daeryddiaeth, a phwysleisiwyd yr angen am hyfforddiant arbenigol i sicrhau bod athrawon wedi'u trwytho'n briodol i reoli eu gwahaniaethau'n ddiagonol.

Mae ein hymchwil yn amlygu'r angen i flaenoriaethu hyfforddiant athrawon anarbenigol sydd â'r dasg o addysgu CGM a phynciau eraill y Dyniaethau er mwyn sicrhau nad yw uniondeb y cwricwlwm yn cael ei beryglu. Mae hefyd yn amlwg bod angen mwy o gydnabyddiaeth i heriau a chymhlethdodau unigryw addysgu CGM er mwyn sicrhau bod hyfforddiant wedi'i deilwra'n briodol i'w ofynion addysgegol.

## CRYNODEB O GANFYDDIADAU ALLWEDDOL

Mae ymatebion i'r arolwg yn amlygu heriau a chyfleoedd amrywiol o ran addysgu Crefydd, Gwerthoedd a Moeseg (CGM) yn ysgolion Cymru. Mae canfyddiadau allweddol yn tanlinellu'r angen am gymorth cynhwysfawr, arweiniad cliriach, a buddsoddiad parhaus i sicrhau ei integreiddiad llwyddiannus i'r cwricwlwm. Yn fuan ar ôl cwblhau'r arolwg, derbyniodd y Ganolfan nifer o ohebiaethau gan athrawon a oedd yn awyddus i wneud sylwadau ychwanegol neu i fynegi eu pryderon yn fwy grymus. Isod, mae crynodeb o'r pwyntiau allweddol o'r arolwg a phwyntiau a bwysleisiwyd mewn gohebiaeth atodol gan athrawon.

**Canfyddiad o CGM fel pwnc dibwrpas ac un a danbrisir.** Mae ysgolion yn tueddu i ystyried CGM fel gofyniad gweinyddol 'ticio blwch' yn unig, yn hytrach na chyfle ar gyfer addysg drawsnewidiol.

**Angen hyfforddiant a buddsoddiad.** Mae hyn yn cynnwys buddsoddiad ariannol a chyfleoedd datblygiad proffesiynol i uwchsgilio athrawon ac i wella eu lefelau hyder a chymhwysedd wrth gyflwyno CGM yn ddigonol.

**Eglurder a chysondeb yn y cwricwlwm.** Mae dryswch ymhlith athrawon ac ysgolion ynglŷn â'r disgwyliadau a osodir arnynt ar gyfer addysgu'r prif grefyddau yng Nghyfnod Allweddol 3, ac y gall y lefel bresennol o ryddid a roddir i ysgolion ar lunio'r cwricwlwm CGM arwain at ddarpariaeth anghyson, a, gyda hynny, niweidio'n andwyol eu myfyrwyr yn eu paratodau a'u perfformiadau ar gyfer arholiadau TGAU..

**Argaeledd adnoddau a hyder i addysgu.** Thema sy'n codi dro ar ôl tro yn ein hymchwil yw'r diffyg hyder ymhlith athrawon i gyflwyno digon o wersi CGM, oherwydd adnoddau, gwerslyfrau, cymorth ac arweiniad cyffredinol sydd oll yn annigonol.

**Llwyth gwaith a materion staffio.** Mae heriau staffio sylweddol, gyda rhai ysgolion yn brin o athrawon ag arbenigedd mewn CGM, neu'n gofyn iddynt addysgu pynciau lluosog. Mae hyn yn codi pryderon am ansawdd a chysondeb darpariaeth CGM ar draws ysgolion yng Nghymru.

**Polisiau aneglur y llywodraeth.** Mae galw gan athrawon ac ysgolion am bolisiau addysgol clir i ddiogelu statws CGM o fewn cwricwlwm cymysg y dyniaethau, ac am fwy o arweiniad a chefnogaeth gan gyrff y llywodraeth i sicrhau cysondeb a chydlyniant yn y ddarpariaeth CGM.

**Asesu a Dilyniant.** Yn gysylltiedig â materion o amwysedd ynghylch cwmpas a ffocws y cwricwlwm CGM, mae cwestiynau a godwyd gan athrawon ynghylch y ffordd orau o asesu dilyniant myfyrwyr ar draws y cwricwlwm CGM yn unol ag egwyddorion dilyniant a datganiadau 'beth sy'n bwysig'. Mae awydd am arweiniad gyda chysylltiadau trawsgwricwlaidd a dulliau asesu effeithiol.

**Cyfleoedd dysgu a datblygu proffesiynol.** Mae athrawon yn cydnabod yr angen am ddatblygiad proffesiynol parhaus i ddyfnhau eu gwybodaeth a'u sgiliau wrth addysgu credoau crefyddol ac anghrefyddol..

**Diweddarau'r cwricwlwm i'w gadw'n berthnasol.** Mae angen amlwg i sicrhau bod y cwricwlwm CGM yn cael ei adolygu a'i ddiweddarau'n barhaus i sicrhau ei berthnasedd a'i effeithiolrwydd wrth fodloni disgwyliadau, diddordebau ac anghenion y myfyrwyr eu hunain. Mae hyn yn cynnwys darparu mwy o gyd-destun i'r testunau a addysgir ac osgoi ymestyn y cynnwys yn ddiangen i ymgorffori ffeithiau a gwybodaeth amherthnasol.

**Effaith gadarnhaol CGM.** Er gwaethaf heriau addysgu CGM, mae nifer o ymatebwyr wedi nodi bod newid y cwricwlwm o AG i CGM wedi cael effaith gadarnhaol ar ddiwylliant eu myfyrwyr ac ar yr amgylcheddau addysgu a dysgu yn eu hysgolion.



## CASGLIAD

Mae'r anghysondeb rhwng mandadau cyfreithiol ar gyfer addysgu CGM fel pwnc gorfodol yng Nghymru a sut y rhoddid yr addysg ar waith yn tanlinellu methiant systemaidd ar draws ysgolion Cymru i gadw at egwyddorion sylfaenol y cwricwlwm newydd. Mae'r datgysylltiad rhwng polisi'r llywodraeth ac arfer addysgol yn codi cwestiynau sylfaenol am atebolrwydd a'r angen am safonau addysgol.

Mae pwysau aruthrol ar athrawon wedi'u dwysáu gan ddiffyg adnoddau ac arweiniad digonol ar gyfer CGM, yn awgrymu bod y cwricwlwm newydd wedi'i drefnu'n gyflym a'i weithredu'n anghyfrifol yn ysgolion Cymru heb ystyriaeth a rhagwelediad i'r problemau anochel sydd wedi codi i ysgolion, athrawon, a myfyrwyr fel ei gilydd. Er bod rhai straeon 'newyddion da' i'w clywed yn rhanbarthau'r De-ddwyrain a'r De-orllewin, mae'r sefyllfa'n gyffredinol yn awgrymu bod y rhan fwyaf o fyfyrwyr o dan anfantais ddifrifol gan yr arferion addysg CGM presennol a bod y pwnc yn cael ei beryglu'n fawr.

Mae diffyg hyfforddiant digonol ar gyfer athrawon anarbenigol sydd â'r dasg o gyflwyno CGM yn gwaethygu pryderon ynghylch ansawdd a chysondeb CGM ar draws ysgolion Cymru. Mae prinder arbenigedd pwnc CGM ymhlith athrawon, ynghyd â phrinder staff, a chyfleoedd hyfforddi cyfyngedig, yn gosod heriau sylweddol i weithrediad llwyddiannus y cwricwlwm CGM. Heb gefnogaeth ac adnoddau digonol, gall athrawon barhau i'w chael yn anodd ymdopi â chymhlethdodau addysgu CGM yn effeithiol, ac mae perfformiad eu myfyrwyr yn anochel am ddioddef o ganlyniad.

Mae'r ffocws cul a roddir i astudio crefyddau traddodiadol ar draul safbwyntiau moesegol byd-eang ac athronyddol amrywiol yn cynrychioli cyfle a gollwyd i feithrin cynwysoldeb a dealltwriaeth ddiwylliannol o fewn y cwricwlwm. Er bod y fframwaith ar gyfer y cwricwlwm newydd yn anelu at ehangu cwmpas addysg grefyddol a hybu sgiliau dadansoddi a meddwl yn feirniadol, mae'r pwyslais parhaus ar y 'chwe chrefydd fawr' yn methu â symud y tu hwnt i'r cwricwlwm Addysg Grefyddol hŷn, ac mae'n adlewyrchu agwedd flinedig a hesb nad yw'n llwyddo i gyfleu amrywiaeth y gymdeithas gyfoes yn ddigonol.

### **Strwythuro cwricwlwm integredig/cymysg y Dyniaethau ar gyfer Cyfnod Allweddol 3 yn ffurfiol.**

Mae ein hymchwil wedi nodi bod mabwysiadu dull dyniaethau cymysg neu integredig addysgu CGM wedi arwain at wthio CGM at y cyrion, yn benodol o fewn y cwricwlwm, gyda phynciau eraill (yn arbennig, Hanes a Daeryddiaeth) yn derbyn mwy o amser neilltuedig, a hynny yn anghymesur. Er nad yw hyn yn broblem i bob ysgol yng Nghymru, mae'n amlwg fod canran sylweddol o ysgolion yn wynebu heriau niferus wrth gyflwyno cwricwlwm Dyniaethau sy'n rhoi amser a gofod cyfartal i CGM ochr yn ochr â phynciau eraill y Dyniaethau. Mae atal CGM yng nghwricwlwm y Dyniaethau mewn perygl o bylu sgiliau

cymdeithasol a dadansoddol hanfodol i fyfyrwyr, sgiliau sy'n hanfodol ar gyfer twf academaidd, cymdeithasol a phersonol.

Argymhellir y dylid cydnabod effaith cwricwlwm cymysg y Dyniaethau ar ganlyniadau TGAU a chanlyniadau Safon Uwch. Mae ein hymchwil yn awgrymu y bydd llawer iawn o fyfyrwyr yn cael eu haddysgu am CGM yn ystod Cyfnod Allweddol 3 gan athrawon sy'n arbenigo mewn Hanes neu Ddaearyddiaeth, ac sydd heb wybodaeth arbenigol ar gyfer CGM. Mae tebygolrwydd amlwg na fydd y myfyrwyr hyn yn datblygu'r sgiliau angenrheidiol i symud ymlaen i TGAU Astudiaethau Crefyddol neu Safon Uwch Astudiaethau Crefyddol. Yn yr un modd, os bydd yr athrawon hyn yn methu â meithrin brwdfrydedd am CGM yn eu myfyrwyr, gallai arwain at ostyngiad yn nifer y myfyrwyr sy'n dewis astudio Astudiaethau Crefyddol ar lefel arholiad. Ymhellach, o ystyried natur sensitif rhai pynciau CGM, mae perygl y gallai'r athrawon hyn dramgwyddo grwpiau crefyddol yn anfwriadol a pheryglu cyfanrwydd y pwnc trwy gyflwyno syniadau'n anghywir neu gyflwyno tasgau amhriodol wrth addysgu.

Mae angen canllawiau clir i ddiogelu CGM ar draws lleoliadau addysgol. O ystyried rôl ganolog CGM yn paratoi myfyrwyr ar gyfer bywyd a gwaith go iawn o fewn Cymru amlddiwylliannol a thu hwnt, mae dadl gref dros ddysgu CGM fel pwnc ar wahân ac ar ei ben ei hun yn unig. Fodd bynnag, os yw Senedd Cymru am geisio parhau i gynnwys CGM yng nghwricwlwm y Dyniaethau cymysg, dylai ddarparu canllawiau clir sy'n nodi strwythur y cwricwlwm hyn er mwyn sicrhau bod amser cyfartal yn cael ei ddyrannu ar gyfer pob pwnc. At hynny, mae angen arweiniad clir ar ysgolion ynghylch a ddylid cyflwyno cwricwlwm Dyniaethau cymysg drwy unedau penodol, gyda phob un yn canolbwyntio ar un pwnc Dyniaethau, neu a ddylid mabwysiadu ymagwedd thematig, lle mae thema benodol yn cael ei harchwilio o wahanol safbwyntiau a gasglwyd o bob pwnc yn y Dyniaethau.

Rydym yn annog Senedd Cymru i sicrhau bod Estyn, yr arolygiaeth addysg ar gyfer Cymru, yn adolygu'r modd y cyflwynir CGM ym mhob ysgol a sefydlu mandad sy'n sicrhau nad yw CGM yn cael ei roi o'r neilltu o fewn y cwricwlwm ysgol. Rydym yn argymhell yn gryf bod Senedd Cymru yn cydweithio â Chanolfan Genedlaethol Addysg Grefyddol Cymru i lunio set glir a chynhwysfawr o ganllawiau sy'n gosod CGM yn gywir, yn deg ac yn effeithiol o fewn y cwricwlwm. Bydd y canllawiau hyn yn pwysleisio'r gofynion amser angenrheidiol a neilltuir i CGM ar draws pob Cyfnod Allweddol.

### **Darparu sesiynau Datblygiad Proffesiynol Parhaus (DPP) sy'n rhad ac am ddim ac sy'n hawdd eu cyrraedd ar gyfer athrawon CGM ac athrawon anarbenigol sydd â'r dasg o addysgu CGM.**

Mae addysgu CGM gan athrawon nad oes ganddynt unrhyw arbenigedd yn y maes pwnc yn peri pryder, yn enwedig pan ystyrir natur sensitif ei gynnwys a'r posibilrwydd y gallai llawer o athrawon anarbenigol gamliwio'n anfwriadol, ac o bosibl, dramgwyddo myfyrwyr ac eraill oherwydd eu diffyg gwybodaeth am syniadau, credoau a safbwyntiau crefyddol ac athronyddol. At hynny, mae'r sgiliau dadansoddi beirniadol a myfyriol y mae CGM yn eu haddysgu yn gofyn am rywfaint o soffistigedigrwydd a hyfedredd y gallai athrawon anarbenigol eu gweld yn agweddau heriol. Daw hyn yn arbennig o broblematig wrth baratoi myfyrwyr ar gyfer gofynion yr arholiad TGAU yn y pwnc.

Mae gohebiaeth â'n Canolfan gan athrawon yn dangos bod ymagwedd y Dyniaethau cymysg at CGM yn dechrau cael effaith andwyol ar ddatblygiad proffesiynol athrawon cyswllt, drwy eu hatal rhag cwblhau eu TAR oherwydd diffyg cyfleoedd i addysgu CGM yn ystod lleoliadau.

Mae'r methiannau hyn yn galw am weithredu brys i fynd i'r afael â'r sefyllfa bresennol. Mae canllawiau clir a diamwys, adnoddau cynhwysfawr sydd ar gael yn rhwydd, a mecanweithiau cymorth cadarn yn hanfodol i sicrhau gweithrediad llwyddiannus y cwricwlwm CGM.

Er ei bod yn ymddangos bod y rhan fwyaf o athrawon yn canmol y trawsnewid o AG i CGM ac yn nodi pwysigrwydd cymdeithasol a pherthnasedd amserol ei gynnwys fel mater allweddol, mae teimlad cyffredinol o bryder yn treiddio drwy'r sylwadau a wnaed gan athrawon drwy gydol yr arolwg, ac mae hyn yn parhau yn y llif cyson o ohebiaeth rydym yn parhau i'w derbyn yn y Ganolfan gan athrawon CGM ers mabwysiadu'r cwricwlwm newydd yng Nghymru.

Mae'n hanfodol gofalu am fesurau a mentrau rhagweithiol, gan gynnwys datblygiad proffesiynol sydd wedi'i dargedu, diwygiadau i'r cwricwlwm, a gwell fecanweithiau cymorth i sicrhau gweithrediad llwyddiannus y cwricwlwm CGM, a thrwy hynny, wireddu potensial CGM fel grym trawsnewidiol yn addysg Cymru.

## ARGYMHELLION

Dyma ein hargymhellion yn sgil yr ymchwil.

### Eglurder y llywodraeth yn y defnydd o derminoleg.

Mae'r termau, 'Crefydd', 'Gwerthoedd', a 'Moeseg', wedi achosi cryn ddryswch i athrawon, yn enwedig ar gyfer diffiniad 'Gwerthoedd' o fewn y fframwaith hwn. Mae ar athrawon angen arweiniad clir gan Senedd Cymru ar frys i egluro ystyr y termau hyn, yn enwedig y gwahaniaethau cynnil rhwng 'Moeseg' a 'Gwerthoedd'. A yw 'Moeseg' a 'Gwerthoedd' i fod i gael eu trin yn gyfystyr neu a fwriedir iddynt gyfleu ystyron gwahanol o fewn y cwricwlwm CGM? Yn yr un modd, a yw 'Gwerthoedd' o fewn 'CGM' yn gysylltiedig â mathau penodol o werthoedd, yn debyg, efallai, i'r fenter 'British Values' yn Lloegr? Mae eglurder ar ddiffiniad ac ystyr 'Crefydd', 'Gwerthoedd', a 'Moeseg', o ran eu pwrpas, eu harwyddocâd, a'u haliniad ag amcanion addysgol trosfwaol yn hanfodol i sicrhau dealltwriaeth unfurf ar draws sefydliadau addysgol ac i atal anghysondebau yn yr addysg a'r gwerthoedd a gyflwynir gan wahanol ysgolion yng Nghymru.

### Canllawiau'r llywodraeth ar gynnwys.

Er bod athrawon yn gyffredinol yn ymddangos yn obeithiol am y cyfleoedd y mae CGM yn eu darparu ar gyfer integreiddio safbwyntiau athronyddol a moesegol o'r byd i'w cwricwlwm, rydym wedi nodi nad yw llawer yn gallu adnabod a dewis damcaniaethau athronyddol neu foesegol addas i'w hymgorffori yn eu cynlluniau addysgu.

Nid oes gan y llenyddiaeth gyfredol a ddarperir gan Senedd Cymru ganllawiau cynhwysfawr ar yr hyn sy'n gyfystyr â bydolwg athronyddol neu foesegol briodol, gan ei bod yn cynnig enghreifftiau cyfyngedig yn unig, megis heddychiaeth a feganiaeth foesegol. Mae hyn wedi arwain nifer o athrawon ac ysgolion i oedi ac, weithiau, ymatal rhag addasu eu cwricwlwm, a dewis yn lle hynny ddychwelyd i'r cwricwlwm AG yn hytrach nag arallgyfeirio eu cwricwlwm i gynnwys sbectrwm ehangach o fydolygon crefyddol a seciwlar.

Mae angen dybryd am arweiniad cliriach ar y mathau o safbwyntiau athronyddol a moesegol o'r byd y gellid eu hintegreiddio'n ddi-dor i'r cwricwlwm. Mae angen ategu hyn gyda chynlluniau gwaith enghreifftiol a ddsberthir i bob athro CGM sy'n enghreifftiau ymarferol (naill ai i'w gweithredu'n uniongyrchol yn eu haddysgu neu fel ffynonellau ysbrydoliaeth) sy'n dangos ffyrdd effeithiol o ymgorffori safbwyntiau athronyddol a moesegol o'r byd mewn cwricwlwm CGM.

Drwy Ganolfan Genedlaethol Addysg Grefyddol Cymru, yr ydym mewn sefyllfa dda i ddatblygu'r cynlluniau gwaith hyn, ac i'r perwyl hwnnw, gwahoddwn Senedd Cymru i gydweithio â ni.

O ystyried y pryderon hyn, rydym yn argymhell yn gryf bod Senedd Cymru yn annog ysgolion uwchradd i beidio â mabwysiadu cwricwlwm Dyniaethau cymysg yng Nghyfnod Allweddol 3. Ateb arall fyddai i SC weithio gyda Chanolfan Genedlaethol Addysg Grefyddol Cymru i

sefydlu cynllun Datblygiad Proffesiynol Parhaus (DPP), gyda rhaglenni sydd wedi'u teilwra i anghenion athrawon anarbenigol sydd â'r dasg o addysgu CGM. Byddai'r rhaglenni hyn yn darparu hyfforddiant ar-lein hygyrch heb unrhyw gost i ysgolion ledled Cymru.

Mae sesiynau DPP ar-lein ar gael ar hyn o bryd i athrawon sydd ag arbenigedd mewn CGM, ond mae'r rhain yn ddrud, ac ar gael yn Saesneg yn unig ac nid yn Gymraeg. Bydd angen i sesiynau DPP gyflwyno amrywiaeth eang o safbwyntiau athronyddol a moesegol o'r byd sy'n addas i'w cynnwys yn y cwricwlwm CGM newydd i athrawon CGM presennol. Maent yn hanfodol i sicrhau bod athrawon yn meddu ar y wybodaeth bynciol angenrheidiol i gyflwyno'r agweddau hyn ar CGM yn ystyrlon ac yn gywir. Gallant helpu i roi hyder i athrawon addysgu'r pynciau hyn a'u cynorthwyo i osgoi camliwio'n gyffredinol safbwyntiau byd-eang amrywiol. Rydym mewn sefyllfa dda i ddarparu cyfleoedd DPP i sicrhau gweithrediad effeithiol CGM mewn ysgolion gan athrawon CGM arbenigol ac anarbenigol CGM fel ei gilydd.

### **Dyrannu adnoddau addysgeg CGM.**

Mae ein hymchwil yn dwyn sylw at yr heriau sylweddol y mae ysgolion ac athrawon yn eu hwynebu wrth ganfod a chael mynediad at adnoddau addysgegol defnyddiol i'w cynorthwyo i addysgu CGM. Teimlir hyn amlaf mewn ysgolion cyfrwng Cymraeg lle mae adnoddau'n brin, o'u cymharu ag ysgolion cyfrwng Saesneg sy'n elwa o adnoddau a gyhoeddwyd yn *RE Today* a sesiynau hyfforddi DPP (gyda'r amod mai dim ond aelodau o Gymdeithas Genedlaethol Cymdeithasau Addysgu Cymru sydd yn â mynediad i *RE Today*) sydd yn aml ar gost ariannol bersonol. Mae gan y gwahaniaeth yn yr adnoddau sydd ar gael yn y Gymraeg a'r Saesneg oblygiadau i ddatblygiad cwricwlwm. Tra bod rhai ysgolion cyfrwng Saesneg wedi llwyddo i arallgyfeirio eu cwricwlwm i gwmpasu bydolygon crefyddol, ysbrydol ac athronyddol nad oedd wedi'u cynnwys yn eu cwricwlwm o'r blaen, mae athrawon cyfrwng Cymraeg yn bennaf yn cynnal cwricwlwm sy'n adlewyrchu'r cwricwlwm AG blaenorol, trwy ganolbwyntio ar chwe phrif grefydd y byd.

I gwrdd â'r heriau hyn, mae Canolfan Genedlaethol Addysg Grefyddol Cymru wedi ymrwymo i ddarparu ystod o adnoddau dwyieithog rhad ac am ddim, gan gynnwys cynlluniau gwaith, adnoddau cyfryngau, a chyfleoedd DPP i bob ysgol yng Nghymru. Ond mae'r Ganolfan angen cydweithio â Senedd Cymru i gael mwy o eglurder ar ei gweledigaeth ar gyfer CGM. Bydd hyn yn sicrhau bod yr adnoddau a gynhyrchir gan y Ganolfan yn cyd-fynd ag amcanion y Senedd.

### **Cadw athrawon CGM yng Nghymru.**

Mae ein Canolfan wedi derbyn gohebiaeth bryderus gan athrawon CGM/AG sy'n esbonio sut y mae cyflwyno dull y Dyniaethau cymysg yng Nghyfnod Allweddol 3 wedi achosi iddynt, neu eu cydweithwyr, adael eu hysgolion yng Nghymru i ddod o hyd i swyddi addysgu mewn AG yn Lloegr. Mae'r adroddiadau a'r straeon cyffredin a glywn yn yr achosion hyn yn ymwneud â'u rhwystredigaeth ynghylch gwthio CGM i ymylon cwricwlwm cymysg y Dyniaethau a fabwysiadwyd gan eu hysgolion, a sut y cawsant eu hunain, o ganlyniad, yn gorfod addysgu

Hanes a Daearyddiaeth yn lle hynny—pynciau nad oeddent yn ddigon cymwys i'w haddysgu, ac yn teimlo ychydig iawn o frwdfrydedd drostynt.

Mae'n destun pryder mawr os yw'r enghreifftiau hyn yn adlewyrchu tuedd genedlaethol gynyddol o athrawon CGM yn adleoli i Loegr. Mae'n anochel y byddai hyn yn gwaethygu'r prinder addysgu o safon mewn CGM yng Nghymru. Mae'r pryder yn fwy dybryd wrth ystyried y ffaith bod bwrsariau o hyd at £10,000 bellach ar gael i'r rhai sy'n dymuno hyfforddi fel athrawon Addysg Grefyddol yn Lloegr, tra nad oes bwrsariau o'r fath ar gael i athrawon dan hyfforddiant yng Nghymru. Mae'n debygol y bydd mwy o raddedigion o Gymru yn dewis cofrestru ar raglenni TAR yn Lloegr o'r herwydd.

Er efallai na fydd yn bosibl i Senedd Cymru gynnig bwrsariau cystadleuol ar gyfer TAR CGM/AG er mwyn sicrhau bod yr athrawon dan hyfforddiant o ansawdd da yn cael eu cadw yng Nghymru, gall y Senedd ddechrau lleihau'r effeithiau andwyol ar CGM mewn ysgolion uwchradd drwy ddefnyddio'r hyn a argymhellir gyda'r strategaethau yr ydym yn eu hamlinellu yn yr adroddiad hwn.

#### **Canllawiau clir ar gyfer CA4.**

Mae ein hymchwil yn datgelu bod nifer sylweddol o ysgolion naill ai wedi dileu neu leihau'n sylweddol ddarpariaeth orfodol Cyfnod Allweddol 4 ar gyfer CGM/AG. Mae'n anochel y bydd y penderfyniad hwn yn cyflymu'r gostyngiad yn nifer y myfyrwyr yng Nghymru sy'n cofrestru ar gyfer TGAU Astudiaethau Crefyddol (AC). Rhwystr ychwanegol a fydd yn debygol o gyfrannu at y dirywiad hwn yw'r penderfyniad diweddar i ddileu'r TGAU cwrs byr yn y pwnc o fis Medi 2025 ymlaen. Mae hyn yn golygu na fydd yna bellach gyrsiau achrededig yn y maes pwnc y gellir eu cwblhau gan ysgolion o fewn yr amser a neilltuwyd yn flaenorol i AG/AC Cyfnod Allweddol 4, sef awr yr wythnos. Er bod y Cwricwlwm Newydd i Gymru yn dileu'r gofyniad cyfreithiol i ysgolion addysgu CGM/AG/AC hyd at 18 oed, mae rhwymedigaeth gyfreithiol ddiamwys ar ysgolion uwchradd i ddarparu CGM/AG/AC i fyfyrwyr hyd at 16 oed.

Rydym yn annog Senedd Cymru i sicrhau addysg CGM/AG/AS i bob myfyriwr hyd at 16 oed, drwy fynd ati i hyrwyddo ac annog ysgolion uwchradd i wahodd myfyrwyr i ddilyn cyrsiau TGAU mewn Astudiaethau Crefyddol, a thrwy sicrhau bod Estyn, Arolygiaeth Addysg Cymru, yn ddiwyd yn monitro darpariaeth CGM/AG/AS yng Nghyfnodau Allweddol 3 a 4 yn ystod ei harolygiadau. Dylai ysgolion sy'n methu â bodloni gofynion ar gyfer cyflwyno CGM/AG/AS ar draws Cyfnodau Allweddol 3 a 4 wynebu canlyniadau dwys.

#### **Diwygio'r cynigion presennol i newid TGAU Astudiaethau Crefyddol (AC).**

Mae gennym amheuan dwys ynghylch strwythur y cwricwlwm TGAU Astudiaethau Crefyddol presennol, a ddaeth i fodolaeth yn 2017, a natur y newidiadau arfaethedig iddo. Rydym yn annog yn gryf bod yr ystyriaethau canlynol yn cael eu hadolygu cyn newid y cwricwlwm TGAU. Cyn 2017, mabwysiadodd ffurf flaenorol y TGAU Astudiaethau Crefyddol ddull thematig, a roddodd ansawdd deinamig a hyblygrwydd i'w strwythur. Mewn cyferbyniad, mae strwythur y cwricwlwm presennol yn anhyblyg ac yn gwahanu crefydd

oddi wrth athroniaeth a moeseg yn annaturiol. Mae'r cwricwlwm presennol yn cynnwys dwy uned sy'n archwilio credoau ac arferion dwy grefydd, a dwy uned sy'n archwilio dysgeidiaeth athronyddol a moesegol dwy grefydd mewn perthynas â thema benodol. Er bod y cwricwlwm presennol yn annog trylwyrdd academiaidd trwy feithrin sgiliau dadansoddi ac ysgrifennu estynedig, mae'n methu ag integreiddio'n ddi-dor gredoau ac arferion crefyddol ag ystyriaethau athronyddol a moesol ehangach, a materion cymdeithasol cyfoes y gall myfyrwyr uniaethu â hwy. Efallai nad yw'n syndod bod strwythur anhyblyg a haniaethol y TGAU presennol wedi cyd-daro â gostyngiad nodedig yn nifer y myfyrwyr sy'n sefyll Astudiaethau Crefyddol ar lefel TGAU a Safon Uwch.

Rydym wedi dadansoddi gyda diddordeb y cynigion i adolygu'r TGAU cyfredol mewn Astudiaethau Crefyddol. Roeddem wedi gobeithio y byddai dychwelyd at ddull thematig i annog myfyrwyr i fyfyrion ystyrion ar gredoau crefyddol mewn cysylltiad â materion athronyddol a moesegol tra'n cynnal ei sgiliau academiaidd trwyadl. Rydym yn siomedig o weld y cynigion yn ceisio cynnal strwythur anhyblyg y cwricwlwm presennol.

Rydym yn eiriol dros ailenwi'r TGAU yn 'Grefydd, Gwerthoedd a Moeseg' er mwyn adlewyrchu ei gynnwys yn fwy cywir ac i ddarparu naratif addysgegol cyson ar draws profiad addysgol y myfyriwr, o ystyried mai CGM y bydd myfyrwyr wedi ei adnabod o'r ysgol gynradd hyd at Gyfnod Allweddol 3 erbyn iddynt gyrraedd eu TGAU. Rydym yn annog Senedd Cymru i ailystyried y newidiadau arfaethedig, ac rydym yn awyddus i gydweithio i ddatblygu dull sy'n meithrin ymgysylltiad myfyrwyr ag anghenion addysgol a diddordebau sy'n datblygu'n barhaus garfannau myfyrwyr newydd, tra'n cynnal cywirdeb y pwnc.

### **Geiriau olaf: yr angen i edrych ymlaen.**

Mae gan gwricwlwm newydd Cymru botensial aruthrol ar gyfer Crefydd, Gwerthoedd a Moeseg (CGM), gan gynnig hyblygrwydd i athrawon lunio cynlluniau gwaith ystyrion sy'n ymglyfarwyddo myfyrwyr â chredoau crefyddol, athronyddol a moesol amrywiol yng Nghymru a thu hwnt. Mae'n gyfle i feithrin ymwybyddiaeth ddiwylliannol, herio stereoteipiau, a meithrin meddwl beirniadol a dinasyddion byd-eang gwybodus. Gall CGM, o dan y cwricwlwm newydd, rymuso myfyrwyr i adeiladu sylfeini academiaidd cryfion, i ddadansoddi a gwerthuso tystiolaeth, i ffurfio barn wedi'i seilio ar ddadleuon rhesymegol, a datblygu safbwyntiau gwybodus a mwy gwrthrychol, ac i feithrin ymwybyddiaeth gymdeithasol, parch ac empathi.

Fodd bynnag, mae'r llwybr presennol ar gyfer CGM yn atchweliadol ac yn gwyrō'n sylweddol oddi wrth ei botensial. Mae Canolfan Genedlaethol Addysg Grefyddol Cymru yn awyddus i weithio'n agos gyda Senedd Cymru i dorri ar y llwybr dirywiol hwn sy'n dal i edrych yn ôl, gan sicrhau dyfodol disglair posibl CGM i Gymru. I'r perwyl hwnnw, mae'r Ganolfan yn dadlau o blaid yr angen am ymchwil ac ymchwiliad pellach i'r materion a amlinellir yn yr adroddiad hwn.

Ar hyn o bryd nid oes digon o ddata ynghylch gweithredu CGM mewn amgylcheddau cynradd ac AAA. Tra bod data wedi'i brosesu gan 43 o athrawon Cyfnod Allweddol 3 ledled Cymru, mae'r Ganolfan yn bwriadu ehangu ei hymchwiliad trwy ei rhwydwaith o ysgolion i

gynnwys mwy o ysgolion uwchradd. Bydd hyn yn rhoi mwy o eglurder i'r materion sy'n dod i'r amlwg yr ydym wedi'u nodi yn yr adroddiad hwn.